



**BOSNIA AND HERCEGOVINA**  
MINISTRY OF FINANCE  
AND TREASURY

Na osnovu člana 61. Zakona o upravi ("Službeni glasnik BiH", broj 32/ 02 i 102/09), a u vezi člana 17. Zakona o finansiranju institucija Bosne i Hercegovine ("Službeni glasnik BiH", broj 61/04 i 49/09) i člana 13. Zakona o Budžetu institucija Bosne i Hercegovine i međunarodnih obaveza Bosne i Hercegovine za 2010.godinu ("Službeni glasnik BiH", broj 103/ 09), Ministar finansija i trezora donosi,

**Procedure**  
**o ostvarivanju prava budžetskih korisnika iz tekuće rezerve za 2010.godinu**

**I**  
(Predmet Procedure)

Ovim procedurama utvrđuje se postupak i način ostvarivanja prava budžetskih korisnika na sredstva iz tekuće rezerve, kao i postupak i način ostvarivanja prava na transfere neprofitnim organizacijama ili pojedincima, kao i drugim transferima iz sredstava tekuće rezerve u okviru ukupnog iznosa odobrenog Zakonom o Budžetu institucija Bosne i Hercegovine i međunarodnih obaveza Bosne i Hercegovine za 2010. godinu za ovu namjenu.

**II**  
(Postupak i način ostvarivanja prava)

Budžetski korisnik, koji iskazuje potrebu za budžetskim sredstvima iz tekuće rezerve obraća se Vijeću ministara zahtjevom i prijedlogom odluke za dodjelu sredstava iz tekuće rezerve, uz koji obavezno prilaže mišljenje Ministarstva finansija i trezora vezano za podneseni zahtjev i prijedlog odluke, bez čijeg se mišljenja ni jedan zahtjev o dodjeli sredstava iz tekuće rezerve ne može razmatrati.

**III**  
(Upotreba tekuće rezerve)

(1) Vijeće ministara odlučuje o upotrebi tekuće rezerve po svim osnovama i o tome donosi odluku, koju dostavlja na izvršenje Ministarstvu finansija i trezora i budžetskom korisniku-predlagачu, kome su sredstva tekuće rezerve odobrena.

(2) Sredstva tekuće rezerve mogu se koristiti za:

- a) finansiranje hitnih i nepredviđenih izdataka i programe koji nisu uvršteni u u budžet;
- b) finansiranje troškova međunarodnih sporova i arbitraža;
- c) finansiranje novih institucija Bosne i Hercegovine koje tokom fiskalne godine steknu status budžetskog korisnika;
- d) grantove neprofitnim organizacijama.

(3) U Zakonu o Budžetu institucija Bosne i Hercegovine i međunarodnih obaveza za 2010. godinu u Rasporedu rashoda po budžetskim korisnicima, dio 99992 Rezervisanja namjenski su izdvojena :

- a) Rezervisanja za kapitalna ulaganja- u iznosu od 11.130.000,00 KM;
- b) Rezervisanja za nove institucije- u iznosu od 1.000.000,00 KM.

(4) Odluke koje se dostavljaju na izvršenje moraju biti potpisane i ovjerene od strane Vijeća ministara.

#### IV

(Visina sredstava za neprofitne organizacije i pojedince i način ostvarivanja prava iz tekuće rezerve)

(1) Neprofitnim organizacijama ili pojedincima Vijeće ministara može odobriti sredstva tekuće rezerve iskazana u Budžetu institucija Bosne i Hercegovine za 2010. godinu, odobrena za tu namjenu, u slučaju da se prijave i ispune uvjete javnog konkursa koji raspisuje Ministarstvo civilnih poslova Bosne i Hercegovine. Za 2010. godinu sredstva za ove namjene iznose 664.000,00 KM (čl. 13. st. (2) Zakona o Budžetu institucija BiH i međunarodnih obaveza BiH za 2010. godinu).

(2) Kriterije javnog konkursa utvrđuje Vijeće ministara na prijedlog Ministarstva civilnih poslova. Vijeće ministara BiH donosi odluku o razdiobi sredstava iz stava (1) ovoga člana na prijedlog Ministarstva civilnih poslova BiH.

#### V

(Pravila realizacije)

(1) Po prijemu odluke o tekućoj rezervi budžetski korisnik je dužan izvršiti raspored odobrenih sredstava tekuće rezerve po namjeni trošenja i ekonomskim kodovima iskazati ih u Tabeli 5. (propisana Instrukcijom o načinu izrade operativnog plana za izvršavanje Budžeta institucija BiH broj 01-05-16-3-1/10) i istu uz kopiju Odluke o odobrenim sredstvima tekuće rezerve dostaviti Ministarstvu finansija i trezora, Sektor za budžet.

(2) Na osnovu odluke Vijeća ministara Bosne i Hercegovine o odobrenoj tekućoj rezervi i usuglašenog rasporeda troškova, dostavljenog od strane korisnika tekuće rezerve, Sektor za budžet vrši odobravanje sredstava tekuće rezerve u Informacioni sistem finansijskog upravljanja ( ISFU ) i o tome, uz kopiju odluke Vijeća ministara o dodjeli sredstava iz tekuće rezerve, obavještava Sektor za trezorsko poslovanje.

## **VI**

(realizacija odluke o odobrenim sredstvima iz tekuće rezerve neprofitnim organizacijama i pojedincima)

(1) Sredstva tekuće rezerve odobrena neprofitnim organizacijama ili pojedincima u smislu člana 3., stava (1) ovih Procedura daju se na raspolaganje u Sektoru za budžet, na osnovu odluke Vijeća ministara o dodjeli sredstava iz tekuće rezerve i usuglašenog rasporeda po korisnicima, dostavljenog od strane Ministarstva civilnih poslova i o tome, uz kopiju odluke Vijeća ministara o dodjeli sredstava iz tekuće rezerve, obavještava Sektor za trezorsko poslovanje, radi realizacije istih.

(2) Ministarstvo civilnih poslova, ili predlagač za dodjelu sredstava iz tekuće rezerve za druge transfere, obvezni su Ministarstvu finansija i trezora, Sektor za trezorsko poslovanje dostaviti nalog za unos obaveza.

## **VII**

(Evidentiranje i realizacija odluka za interventno korištenje tekuće rezerve)

(1) Sredstva tekuće rezerve, odobrena u skladu sa Odlukom Vijeća ministara Bosne i Hercegovine o prijenosu ovlaštenja predsjedavajućem i zamjenicima predsjedavajućeg Vijeća ministara Bosne i Hercegovine za interventno korištenje sredstava tekuće budžetske rezerve, evidentiraju se u Informacioni sistem finansijskog upravljanja (ISFU) u Ministarstvu finansija i trezora, Sektor za budžet na osnovu pojedinačnih odluka predsjedavajućeg ili zamjenika predsjedavajućeg, koje Uredi predsjedavajući, odnosno zamjenika predsjedavajućeg, nakon donošenja dostavljaju Sektoru za budžet. Uz kopiju pojedinačne odluke predsjedavajućeg, odnosno zamjenika predsjedavajućeg Sektor za budžet o izvršenom unosu u ISFU, obavještava Sektor za trezorsko poslovanje radi realizacije istih.

(2) Uredi predsjedavajućeg i zamjenika predsjedavajućeg, za korisnike tekuće rezerve iz člana 3. stava (3) ovih Procedura, Ministarstvu finansija i trezora, Sektor za trezorsko poslovanje dostavljaju nalog za unos obaveza.

## **VIII**

(Obaveza provedbe postupka i načina ostvarivanja prava)

Prije provedenih radnji, navedenih u članovima 1.do 7. ovih Procedura ne može se ni na koji način raspolagati sredstvima tekuće rezerve.

**IX**  
(Dostavljanje)

Ove Procedure dostavit će se svim budžetskim korisnicima i objaviti na web- stranici Ministarstva finansija i trezora Bosne i Hercegovine i iste će se primjenjivati na sve dodjele sredstava tekuće rezerve u budžetskoj 2010. godini.

**X**  
(Završne odredbe)

Procedure stupaju na snagu danom potpisa od strane Ministra finansija i trezora.

Broj: 01-05-16-1-1391-1/10  
Sarajevo, 03.02.2010.godine

**Ministar**  
**Dragan Vrankić**